

## **Filipos pygua kuery pe Paulo ombopara va'ekue**

## **Filipos pygua kuery pe Paulo ombopara va'ekue**

Filipos tetā re ma Roma pygua huvixave opena raka'e, Macedônia yvy re oĩ, aŷ Grécia re. Ha'e pygua igreja ma Europa pygua jypy'i apóstolo Paulo omboopy va'ekue (Atos 16.12-40).

Filipos tetā gui Paulo oo ma rire ombotya nhuã py. Ha'e gui Filipos pygua kuery nhuã py Paulo oĩa omombe'ua rã oendu vy ixupe guarã ogueru ruka jepi oipytyvõ vy. Ha'e ramo apóstolo Paulo nhuã py oĩ reve ae kova'e kuaxia ombopara raka'e ha'e kuery pe oguerovy'a vy.

Mba'eta nhuã py Paulo oĩ va'eri nda'ikueraí, ov'y'a tema oikovy, ha'e ijayvu ha'e kuery voi ov'y'a avi aguã re. Aipoe'i: "Peẽ kuery re xema'endu'a nhavõ arov'y'a Xeruete. Anhembo'e nhavõ peẽ kuery ha'e javive re ajerure riae avy'a reve" (1.3-4). "Ha'e gui xapy'a rei xeruguy omoëa 'rã Nhan-deruete pe mymba ome'ẽmbi rami, pejerovia peme'ẽ va'e irûrã. Ha'e rami teĩ ae ma xee avy'a 'rã, ha'e peẽ kuery ha'e javi reve 'rã arov'y'a. Ha'e rami rã peẽ voi ke pevy'a, ha'e xererovy'a guive" (2.17-18). "Pevy'a riae ke Senhor re. Peteigüe ju aipoa'e: Pevy'a riae ke", he'i (4.4).

Paulo ijayvu avi ha'e kuery peteĩ rami ikuai aguã. "Peẽ voi ke pendejee pemoï Cristo Jesus py'a re oĩ va'e ramigua, mba'eta ha'e va'e ma

Nhanderuete rami ete oiko va'eri nonhea'ãi raka'e Nhanderuete rami riae yvate aguã. Ha'e rami 'râgue py ojegui ha'e ae yvatea oipe'a vy tembiguai rami ju oiko, ava ojeapo vy. Ha'e rami vy ava rami ojekuaa vy onhemô'yvy'i've ete. Ha'e vy onhe'ẽ rendu kuruxu re eteve voi ojejuka uka peve. Ha'e rami rire Nhanderuete ombovate ju pavẽ aryve, ha'e heryrã ome'ẽ tery ikuai va'e gui yvateve va'e, Jesus rery pavẽ omboete vyi guenapy'ã re oĩ aguã, yva re, yvy re ha'e yvy guýry ikuai va'e guive, ha'e gui ha'e javive 'Jesus Cristo ae Senhor oiko' he'i okuapy aguã, Nhanderuete omboetea rupi," he'i (2.5-11).

### *Oxarura reve ijayvu vy omboypyague*

<sup>1</sup> Paulo ha'e Timóteo, Cristo Jesus rembiguai roiko va'e roxarura Filipos tetã py Cristo Jesus re vy iky'a e'ŷ va'e pendekuai va'e ha'e javive pe, joe opena va'e ha'e nhopytyvõa kuery pe guive.\*

<sup>2</sup> Tove peẽ kuery tapendu penemboaxya ha'e mby'a porã Nhanderuete, Senhor Jesus Cristo Ru va'e guigua.

### *Filipos pygua kuery re oguerovy'a ha'e ojerureague*

<sup>3</sup> Peẽ kuery re xema'endu'a nhavõ arov'y'a Xeruete.

<sup>4</sup> Anhembo'e nhavõ peẽ kuery ha'e javive re ajerure riae avy'a reve.

<sup>5</sup> Xema'endu'a jypy'i guive aŷ peve ayvu porã mombe'ua rupi xereve penhea'ã pekuapya re.

---

\* **1:1** Atos 16.12-40

<sup>6</sup> Mba'eta xee aikuaa porã Cristo Jesus oua ára peve peẽ kuery re mba'emo porã moĩ ypyare omoĩmba 'rãa.

<sup>7</sup> Ha'eve peẽ kuery re xema'endu'a riae aguã, mba'eta xepy'a re aendu roayvua. Mba'eta Nhanderuete xemboaxy vy ixupe amba'eapo aguã xemoĩ rire peẽ kuery xepytyvõ pekuapy nhuã py aĩ rãa, ha'e ayvu porã anhetẽ va'e amombe'ua rupi guive.

<sup>8</sup> Nhanderuete oikuaa peẽ kuery ha'e javive roex-axeia. Ha'e rami aguã ma Cristo Jesus gui ae aendu.

<sup>9</sup> Po rami ajerure ixupe: Pendere tomoĩve heravy mborayvu, mba'emo peikuaa porãve ha'e opa mba'e py pene'arandua reve,

<sup>10</sup> iporã va'e anho pendejee guarã peiporavo aguã, iky'a e'ŷ va'e ha'e ojou vaipy e'ŷ pendekuai aguã Cristo ára pyguarã,

<sup>11</sup> Jesus Cristo guigua teko porã anho pexa uka rã Nhanderuete oguerovy'aa ha'e omboetea aguã.

*Apóstolo Paulo re mba'emo oiko ramo hetave ayvu porã oendua re ijayvuague*

<sup>12</sup> Ha'e gui irmão kuery, aipota peikuaa mba'emo xere oiko rire ayvu porã oenduave ague.

<sup>13</sup> Mba'eta huvixave pegua jopya kuery oikuaapa Cristo káuxa nhuã py aĩa, ha'e amboae kuery ha'e javi voi.\*

<sup>14</sup> Ha'e ramo irmão kuery voi Senhor káuxa nhuã py aĩa heta oikuaa vy ipy'a guaxu vy ndokyjevei okuapy Nhanderuete ayvu omombe'u aguã.

---

\* <sup>1:13</sup> Atos 28.16,30,31; Efésios 6.19,20

**15** Ikuai avi amongue ete'i xere ija'e e'ŷa rupi Cristo regua ayvu omombe'u va'e, xegui onhemboyyvat-evexe vy rive. Ha'e rā amboae kuery ma anhetē rupi omombe'u.

**16** Ha'e va'e kuery ma porayvua rupi ayvu omombe'u, mba'eta oikuua ayvu porā mombe'uarā xemoŷague.

**17** Ha'e rā amboae kuery ma onhemboyyvate reixe vy rive omombe'u Cristo regua, anhetē rupi e'ŷ, mba'eta ha'e kuery ojapoxe nhuā py aña py ajex-avaive aguā rami.

**18** Ha'e rami teī xee ma ndaikuua potai. Mba'eta anhetē rupi, ha'e'ŷ vy anhetē rupi e'ŷ teī Cristo omombe'ua ramo avy'a, ha'e avy'a tema 'rā guive.

**19** Mba'eta po rami aikuua porā: Xere pejerure ramo Jesus Cristo Nhe'ẽ xepytyvō 'rā opa mba'e gui aa jepe aguā.

**20** Xee aipota ete va'e, ha'e ajeroviaa ma mba'eve py axīmba e'ŷ aguā. Ha'e rami 'rāgue py xepy'a guaxu aguā, aiko jepiaty rami aŷ voi xee aikoa rupi Cristo omboetea aguā, aikove e'ŷ vy amano teī.

**21** Mba'eta xevy pe ma aikovea Cristo pe aiko aguā, ha'e rā amano aguā ma ajoupave aguā.

**22** Ha'e rami teī, xero'o re aikove teri reve amba'eapoa rupi iporā va'e oiko ramo xee ndaiporavo kuaai,

**23** mba'eta mokoŷ rami aendu. Mba'eta aaxe Cristo reve aiko aguā. Ha'e va'e ma opa mba'e gui ha'eveva va'e.

**24** Ha'e rami avi xero'o re ranhe aikove vy 'rāe peē kuery roipytyvōve.

**25** Ha'e nunga rupi aikuua porā peē kuery ha'e javi reve apytave ranhe 'rāa, pevy'a ha'e pejeroviave

aguā,

<sup>26</sup> mba'eta peē kuerya py ju avaē rā xerexa vy perovy'ave 'rā Cristo Jesus.

*Cristo reve vy peteī rami nhanhea'ā aguā re ijayvua*

<sup>27</sup> Opa mba'e gui ha'eveva va'e ma Cristo regua ayvu porā omboetea aguā rami pendekuai aguā. Ha'e rami rā peē kuery roexa vy aa, ha'e'ŷ vy ndaai teī pendekuaia omombe'ua rā aendu vy aikuaa 'rā peteī Nhe'ē re peī atāa, ha'e peteī'i rami penhea'ā pekuapya ayvu porā rupi jajeroviaa re,

<sup>28</sup> mba'eve py nhanderovaigua kuery gui pekyje e'ŷ re. Ha'e kuery ma ha'e rami pendekuaia oexa vy oikuaa okanhy aguā rami ikuia, ha'e rā peē kuery ma peikuua Nhanderuete re vy peo jepe 'rāa.

<sup>29</sup> Mba'eta pendevy pe ome'ē Cristo káuxa pendekuai axy aguā, hexe pejerovia aguā anho e'ŷ,

<sup>30</sup> mba'eta peē voi penhea'ā pekuapy ymave rupi pexa rā xee anhea'āague rami, ha'e aŷ pendu rā anhea'āa rami avi.\*

## 2

*Jajoayvu ha'e joegui nhanhemo'yvyī've aguā re ijayvua*

<sup>1</sup> Ha'e nunga rupi Cristo re vy penembaraetea pendu vy, penderayvua py pendep'y'a guaxu, Nhe'ē reve peteī rami pendekuai, ha'e pendeporayvua rupi penhomboaxya pendu vy,

<sup>2</sup> ha'e rami vy xembovy'a ke opa mba'e py, peteī rami peikuaa vy, jomeme pejoayvu, peteī

---

\* **1:30** Atos 5.41; 1 Pedro 4.12,13

rami anho pendepy'a, ha'e pendepy'a py pete'i  
ramigua anho pendu vy.\*

<sup>3</sup> Mba'eve pejapoeme penhemboyvatea rupi, neĩ  
pejejou porã reia rupi guive. Ha'e rami 'rāgue py  
penhemo'yvy'i vy pete'i-teĩ penhomboyvateve 'rā  
pendejegui.

<sup>4</sup> Pemoĩ pete'i-teĩ peẽ ae peipotaa rami rive'ŷ pen-  
dekuai aguã, ha'e rã amboae kuery oipotaa rami.

*Cristo onhemo'yvy'iague rami avi nhande voi  
nhandekuai aguã re ijayvua*

<sup>5</sup> Peẽ voi pendejee pemoĩ Cristo Jesus py'a re oĩ  
va'e ramigua,

<sup>6</sup> mba'eta ha'e va'e ma Nhanderuete rami ete oiko  
va'eri nonhea'ãi raka'e Nhanderuete rami riae  
yvate aguã.

<sup>7</sup> Ha'e rami 'rāgue py ojegui ha'e ae yvatea oipe'a vy  
tembiguai rami ju oiko, ava ojeapo vy.\* Ha'e rami  
vy ava rami ojekuaa vy

<sup>8</sup> onhemo'yvy'iive ete. Ha'e vy onhe'ẽ rendu ku-  
ruxu re eteve voi ojejuka uka peve.

<sup>9</sup> Ha'e rami rire Nhanderuete omboyvate ju pavẽ  
áryve, ha'e heryrã ome'ẽ tery ikuai va'e gui yvateve  
va'e,

<sup>10</sup> Jesus rery pavẽ omboete vy guenapy'ã re oĩ  
aguã, yva re, yvy re ha'e yvy guýry ikuai va'e guive,

<sup>11</sup> ha'e gui ha'e javive "Jesus Cristo ae Senhor oiko"  
he'i okuapy aguã, Nhanderuete omboetea rupi.\*

*Jaa jepea jaexa uka aguã re ijayvua*

\* **2:2** Romanos 15.5,6; Efésios 4.1-3 \* **2:7** João 13.12-17; 2

Coríntios 8.9 \* **2:11** Efésios 1.20-23; Apocalipse 5.1-14

**12** Ha'e ramo xerembiayvu kuery, peẽ kuery xenhe'ẽ rendu riae pekuapy xerexaa rupi anho e'ŷ, aŷ peẽ kuerya py naĩ jave katuve ma. Ha'e rami vy peo jepea pexa uka-ukave tema pejerokyje ha'e peryryipaa rupi,

**13** mba'eta Nhanderuete ae pendere ojapo 'rã ha'e oipotaa rami pendekuaixe ha'e pendekuai ete aguã rami.

**14** Opa mba'e pejapoa py pendeayvu rei eme, ha'e pejoguero'a rei eme guive,

**15** ojou vaipy e'ŷ ha'e anhetẽ rupigua pendekuai aguã. Ha'e rami vy heko vai ha'e opa marã rei ikuai va'e mbyte pendekuaia rupi pexa uka 'rã Nhanderuete ra'y kuery iky'a e'ŷ va'e peikoa. Mba'eta ha'e kuery mbyte rupi tataendy rami penerexakã peikovy kova'e yvy re,\*

**16** tekove regua ayvu re peẽ atã vy. Ha'e rami rire Cristo oua ára py xee roguerovy'a 'rã nanhea'ã rivei neĩ namba'eapo rivei rire.

**17** Ha'e gui xapy'a rei xeruguy omoõa 'rã Nhan-deruete pe mymba ome'ẽmby rami, pejeroviaa peme'ẽ va'e irûrã. Ha'e rami teĩ ae ma xee avy'a 'rã, ha'e peẽ kuery ha'e javi reve 'rã arov'y'a.

**18** Ha'e rami rã peẽ voi ke pevy'a, ha'e xererovy'a guive.

*Paulo oirũ kuery Timóteo ha'e Epafroditomombe'uague*

**19** Ha'e gui Senhor Jesus re ajerovia peẽ kuerya py ambou voi aguã Timóteo, pendekuaia aikuaa vy xee voi avy'a aguã.

---

\* **2:15** Mateus 5.14-16

**20** Mba'eta xeirũ mboae ndarekoi xee rami oendu va'erã anhetẽ rupi peẽ kuery re opena aguã.

**21** Mba'eta amboae kuery ma ha'e kuery ae oipotaa rami ikuaixe, Cristo oipotaa rami e'ŷ.

**22** Ha'e rã Timóteo ma peẽ voi peikuua ae heko porã va'e oikoa, mba'eta ayvu porã mombe'ua rupi xerupive omaba'eapo nguu pe rami.

**23** Amondouka voi aguã rami aiko, xere mba'emo oiko va'e aikuaa vyve.

**24** Senhor re ajerovia aikovy hare'ŷ re xee voi aju aguã.

**25** Ha'e rami teĩ ajou porã peẽ kuerya py ambou ranhe aguã Epafroditu. Ha'e va'e ma xe-irmão, xereve omaba'eapo ha'e onhea'ã va'ety. Ha'e va'e ma peẽ kuery pemondouka avi raka'e, aiko axy rã xepytyvõ aguã.

**26** Ha'e ramo peẽ kuery ha'e javive penderexaxe ete oikovy, ha'e ipy'a eta rei guive, mba'eta imba'eaxy penduague ixupe omombe'ua rã oendu rire.

**27** Anhetẽ imba'eaxy vy omano rai'i va'ekue, teĩ Nhanderuete omboaxy. Ha'e anho e'ŷ, xee voi xemboaxy avi, xeporiauve ju e'ŷ aguã.

**28** Ha'e nunga rupi ajapurave tema ambou aguã, pexa ju vy perovy'a aguã, ha'e xee voi ndaxeporiau vaipavei aguã.

**29** Ha'e ramo Senhor re vy pemovaẽ ke perovy'a ete reve, ha'e pemboete tema ha'e ramigua avakue ha'e javi.

**30** Mba'eta Cristo pe omaba'eapoa rupi omano rai'i va'ekue ndojeayvuveikue py, peẽ kuery naxepytyvõ reguavei rã xepytyvõ aguã.

**3***Cristo re javy'a aguã re ijayvua*

<sup>1</sup> Ha'e gui xe-irmão kuery, pevy'a tema Senhor re. Ambopara ma voiague ramigua peteīgue ju ambopara. Ha'e rami teĩ ndajou porã e'ŷi, mba'eta penemombaraeve 'rã.\*

*Anhetē rupi e'ŷ nhombo'e va'e kuery gui nhan-heangu aguã re ijayvua*

<sup>2</sup> Penheangu ke jagua rami heko vai va'e kuery gui, mba'eta ha'eve'ŷa rami ombo'eapo, ha'e anhetē rupi e'ŷ jopire omboi uka va'e.\*

<sup>3</sup> Ha'e rã nhande kuery ma opire omboi uka va'e ete nhandekuai, mba'eta Nhe'ẽ rupi nhamboete Nhanderuete, jarovy'a Cristo Jesus, ha'e rã to'o re ma ndajajeroviai va'e.

<sup>4</sup> Ha'eve 'rãgue teĩ xee to'o re ajerovia aguã. Amongue va'e to'o re ojerovia aguã ha'eve va'e rire xee katuve 'rãgue,

<sup>5</sup> mba'eta oito ára arekoa py xepire omboia va'ekue, Israel ramymino aiko, Benjamim kuery regua, hebreu kuery gui xetui'i va'ekue hebreu eterã. Fariseu regua aiko vy lei rupi anhea'ã va'ekue.

<sup>6</sup> Anhea'ãve ete vy igreja kuery re apu'ã rei va'ekue. Lei guigua teko porã rupi aiko ramo xejou porã pavẽ karamboae.

<sup>7</sup> Ha'e rami teĩ mba'emo xembovarearã areko va'ekue pe ma aŷ Cristo re vy "Ovare'ŷ va'e" ha'e.

\* **3:1** Filipenses 2.18, 4.4    \* **3:2** "Jagua rami heko vai va'e" he'ia kuery ma nhombo'ea rupi "Judeu reko rami pendekuai ramo anho 'rã Nhanderuete pendereraa jepe" he'i rive va'e.

<sup>8</sup> Anhetē opa mba'e pe “Ovare'ŷ va'e” ha'e aŷ, mba'eta Cristo Jesus xe-Senhor aikuua aguã ma pavê gui iporâve va'e. Hexe vy amokanhy ha'e nungakue ha'e javi, ha'e “Omombo pyrâ” ha'e guive, hekovia Cristo aupity aguã,

<sup>9</sup> ha'e hexe aĩ aguã. Ha'e rami vy teko porã aupity aguã, xee ae reko porã e'ŷ, neĩ lei guigua e'ŷ guive, ha'e rã Cristo re jajerovia vy jaupity va'erã. Ha'e nunga teko porã ma jajerovia ramo Nhanderuete ome'ẽ 'rã nhandevy.\*

<sup>10</sup> Ha'e rami vy Cristo aikuua ete aguã, ha'e omanoague gui imboete jevyare po'akaa guive. Hexeve aiko axyxé avi, omanoague py guive aikoxe ha'e rami,

<sup>11</sup> marã rami vy pa aupity avi aguã amanoague gui anhemboete ju aguã.

### *Yvate katy nhanerenoĩa re ijayvua*

<sup>12</sup> Xee ma “Aupitypa ma” nda'eí, neĩ “Opa mba'e py xerekó porã” nda'eí guive. Ha'e rami teĩ anheá'ave tema aupity aguã Cristo Jesus ojeupe guarã xejogua vy xerenonderã omoĩ va'ekue.

<sup>13</sup> Irmão kuery, xee ma “Aupitypa ma” nda'eí, teĩ peteĩ'i rupi ma anheá'aikovy: Mba'emo xerakykue opyta va'e gui xerexarai vy anheá'tema xerenonderã oĩ va'e re anho.\*

<sup>14</sup> Anheá'tema xerenonderã oĩ va'e re, aupity aguã iporã va'e Nhanderuete ome'ẽ va'erã. Ha'e va'e ajopy aguã ae Cristo Jesus re vy yvate katy xerenoĩ.

<sup>15</sup> Jajeroviaa rupi nhanembaraete va'e ma ha'e rami ae 'rã jaikuua. Ha'e gui amboae rami ri

\* **3:9** Romanos 3.21-26; Efésios 2.8,9    \* **3:13** Hebreus 12.1-3

peikuaa ramo ha'e nunga avi Nhanderuete oikuaa uka 'rã pãvy.

<sup>16</sup> Ha'e rami vy peteĩ-teĩ jaupity maague rupi tema nhandekuai.

*Cristo kuruxu regua ayvu rovaigua kuery re ijayvua*

<sup>17</sup> Irmão kuery, peẽ avi ke xee aikoa rami tema pendekuai, ha'e ore rami ikuai va'e reko re guive peikuaa porã pota.

<sup>18</sup> Mba'eta nhanembyte rupi heta ikuai Cristo kuruxu rovaigua kuery. Ha'e va'e kuery reko gui mbovykue rei e'ŷ xee romonheangu, ha'e aŷ xerexay reve ju xeayvu ha'e rami.

<sup>19</sup> Ha'e kuery ma okanhy aguã rami ikuai,ombojerovia guyepy ae rive, ha'e oguerovy'a ogueroxí 'rã va'ekue, mba'emo kova'e yvy regua re anho nda'eveive vy.

<sup>20</sup> Ha'e rã nhande kuery retã ma yva re oĩ, ha'e nharõ jaikovy nhandereraa jepea Senhor Jesus Cristo ha'e gui ou rã guarã.

<sup>21</sup> Mba'eta ou vy ombopyaupa 'rã nhanderete ikangy va'e, guete hexakãmba va'e rami avi nhanemboete jevy vy. Opo'akaa rupi 'rã ha'e rami nhanemoingo, opa mba'e re ipo'aka va'e vy.

## 4

<sup>1</sup> Ha'e nunga rupi irmão kuery xerembiajyu va'e, ha'e rami ae tema penembaraete Senhor re. Pendere xema'endu'a riae, mba'eta arov'y'a va'e ha'e xembovy'aarã peiko.

*Evódia ha'e Síntique pe ojerure, ha'e guijavy'a ha'e nhanhembo'e aguã re ijayvua*

<sup>2</sup> Evódia ha'e Síntique pe ajerure Senhor re vy peteĩ rami ju oikuua aguã.

<sup>3</sup> Ha'e gui ndee xeirũ anhetẽ va'e pe ma ajerure avi ha'e va'e kunhague reipytyvõ aguã, mba'eta xereve mokoïve onhea'ã va'ekue ayvu porã mombe'ua rupi, Clemente ha'e xepytyvõa kuery mboae reve guive. Ha'e kuery rery oĩ ma kuaxia tekove oguerekó va'e kuery rery oĩa re.

<sup>4</sup> Pevy'a riae ke Senhor re. Peteĩgue ju aipoa'e: Pevy'a riae ke.

<sup>5</sup> Pavẽ pe pexa uka ha'eve vai'i peikoa. Senhor mombyry e'ŷ oĩ.

<sup>6</sup> Pendepy'a eta rei eme mba'eve re. Ha'e rami 'rãgue py, opa mba'e py Nhanderuete pe pejerure peikotevẽ va'e re. Penhembo'e ha'e pejerure tema perovy'a reve.

<sup>7</sup> Ha'e ramo mby'a porã opa mba'e jaikuua va'e gui iporãve va'e rupi Nhanderuete opena 'rã penekuraxõ ha'e pendepy'a re, Cristo Jesus re vy.

### *Nhandepy'a re mba'emo nhamoĩ aguã re ijayvua*

<sup>8</sup> Ha'e nunga rupi irmão kuery, pendepy'a re pemoĩ anhetẽ va'e ha'e javi, iporã va'e, ha'evea ramigua, iky'a e'ŷ va'e regua, nhombovy'a va'e ha'e ojou porãmby ha'e javi. Ha'e gui ojou porãmby, e'ŷ vy oguerovy'apy mboae oiko rã ha'e nunga re anho peikuua pota.\*

<sup>9</sup> Ha'e gui pejapo mba'emo xegui peikuua, pejopy, pendu ha'e pexa va'ekue ramigua. Ha'e ramo Nhanderuete mby'a porã me'ëa oiko 'rã pendereve.

### *Filipos pygua kuery re Paulo oguerovy'aague*

---

\* **4:8** Romanos 12,1,2

<sup>10</sup> Arov'y'a ete Senhor, mba'eta peteīgue ju pexa uka xepytyvōxe. Ha'e rami aguā pendu ae ma va'ekue, teī pexa uka aguā novaēi teri va'ekue.

<sup>11</sup> Xevy pe mba'emo oata ramo e'ŷ ha'e rami xeayvu, mba'eta oiko va'e py rei aikuaa avy'a aguā.

<sup>12</sup> Aikuua omo'yvyī'imby ha'e omboetevepy aiko aguā. Opa mba'e py, opa marāgua oiko va'e py avy'a kuua, arekopaa py ha'e anhembyayia py, ajoupaa py ha'e xeporiaua py.

<sup>13</sup> Opa mba'e aropo'aka 'rā xemombaraetea re vy.

<sup>14</sup> Ha'e rami avi aiko axy rā peē kuery ha'evea rami xemoirū uka.

<sup>15</sup> Filipos pygua kuery, jypy'i ayvu porā pendu jave pendeyvy Macedônia gui aa ramo jipoi raka'e igreja mboae mba'emo ome'ēa py xepytyvō va'e, peē kuery anho'i e'ŷ vy. Ha'e rami peikuua porā.

<sup>16</sup> Mba'eta Tessalônica tetā py aĩa peve peteīgue'i e'ŷ, mokoīgue peraa uka raka'e aipota va'e oata e'ŷ aguā.

<sup>17</sup> Ha'e rami vy “Peme'ēve ke xevy” nda'ei, mba'eta xee aipota va'e ma peē ae pendjeupe guarā pejoupave aguā.

<sup>18</sup> Mba'eta xee ajopypa ma, arekopa ramo mba'eve ndoatavei, mba'emo peē kuerya gui Epafroditō ogueru va'ekue xepo py omboaxapa rire. Ha'e nunga ma heakuā porā va'e rami oī Nhanderuete pe ome'ēmb yojou porā va'erā, imbovy'aarā.

<sup>19</sup> Ha'e nunga rupi Cristo Jesus re vy Xeruete ojou ukapa 'rā peikotevē va'e, guexakāa py oguerekopa ete va'e vy.

<sup>20</sup> Nhanderuete tomboetea araka'eve rā peve. Amém.

*Oxarura reve opaa py ijayvuague*

<sup>21</sup> Pemombe'u ke axaruraa iky'a e'ŷ va'e kuery  
Cristo Jesus re ikuai va'e ha'e javi pe. Irmão kuery  
xereveguá oxarura uka pëvy.

<sup>22</sup> Iky'a e'ŷ va'e kuery ha'e javi avi oxarura uka  
pëvy, César ro pygua kuery voi.

<sup>23</sup> Tove penenhe'ẽ py tapendu Senhor Jesus  
Cristo penemboaxya.

## **Nhanderuete ayvu iky'a e'ŷ va'e New Testament in Guarani, Mbyá**

copyright © 2004 Wycliffe Bible Translators, Inc.

Language: Mbyá Guarani (Guaraní, Mbyá)

Translation by: Wycliffe Bible Translators, Inc.

### **Copyright Information**

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 853110565X

### **The New Testament**

in Guarani, Mbyá

**© 2004, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

---

PDF generated using Haiola and XeLaTeX on 18 Apr 2025 from source files  
dated 29 Jan 2022  
3309fa3b-7590-5ae9-b829-5df4ddfbf957